

Scuvrir, imprendier ed elavurer

(anr/vp) In marculdi saira haun indigens e giasts pudieu giodair üna spüerta culturela tuot speciela illa Tuor da Samedan. Cun il motto «Wissen im Turm – ein Turm schafft Wissen» haun scolaras e scolars preschanto lur lavur al public.

Südostschweiz

vor 6 Jahren in

Vernissascha illa Tuor cun scolaras e scolars da Samedan

Daspö il temp medievell sto la cuntschainta Tuor da Samedan immez vschinauncha. Mincha di passa bgera glied, indigens scu eir giasts, sper quista tuor via. Be pochs cugnuoschan però eir l'istorgia e l'importanza da la Tuor da Samedan. Cun il böt da pudair valoriser dapü quista tuor medievella ho il cussagl da fundaziun La Tuor lantscho il proget «Wissen im Turm – ein Turm schafft Wissen». Sclaras e scolars da la prüma secundara da Samedan s'haun eir partecipos a quist proget.

Giuvnas e giuvens perscruteders

«Per il cussagl da fundaziun La Tuor d'eira que important da fer valair e preschanter l'istorgia da quist monumaint da la vschinauncha da Samedan», declera Cordula Seger, mnedra artistica dalla fundaziun La Tuor. Per quist motiv es gnieu fat ün proget in collavuraziun cul servezzan archeologic dal Grischun e culla scoula cumünela da Samedan. «Id es bel da vzair cha cun quist proget vains pudieu fasciner a giuvnas e giuvens Samedrins chi s'haun ingaschos cun grand plaschair per quista lavur», manzuna Seger. Cun agüd

da l'archeolog Christoph Walser haun nouv scolaras e scolars da Samedan pudieu perscruter svesta e scuvrir dapü davart l'istorgia da la Tuor immez vschinauncha. «Ils scolars haun lavuro scu drettas perscrutedras e drets perscruteders per scuvrir dapü da la Tuor e preschaintan uossa lur lavur al public», disch Seger.

La Tuor scu center da shopping?

Diversas personas d'eiran preschaintas in marculdi saira a la vernissascha da l'exposiziun illa Tuor. Süls ultims duos plauns da la Tuor haun indigens scu eir giasts pudieu admirer las perscrutaziuns fattas da las scolaras e dals scolars samedrins. Diversas fotografias haun musso il grand ingaschamaint dals giuvens archeologs. Ils scolars nu s'haun però occupos be dal passo da la Tuor, els haun pondero eir davart il futur da quist edificzi antic. Cu pudess La Tuor da Samedan gnir drueda in futur? Quista dumanda haun il scolars pruvo da respunder druvand tuot lur fantasia.

Il proget cuntinua

Pajais da cucagna, fabrica da tschiculatta o forsa dafatta scu center da shopping, las idejas dals scolars per render La Tuor auncha pü attractiva i'l futur sun numerusas. Chi so cu cha La Tuor gnarò ütiliseda in futur? Que chi'd es però sgür al mumaint es cha quist proget vo inavaunt eir d'utuon. Las scolaras ed il scolars varon la pussibilted da scuvrir ed imprendere dapü dal möd da viver, la lavur ed il möd d'abiter illa Tuor düraunt il temp medievel. In dezember gnarò dimena preschanteda la prosma exposiziun dals giuvens perscruteders da Samedan.

La Tuor es averta pel public da marculdi fin dumengia da las 15.00 fin a las 18.00. L'exposiziun da las scolaras e dals scolars samedrins po gnir visitada fin d'inviern da quist'an.